

清人說齋二集

掃葉山房叢行

清人說部

卷之四

秦淮感舊集下

板橋雜記所載秦淮題咏。有風致。有感概。余澹心所謂倘遇旗亭歌者。不能不畫壁也。板橋續記。隨園詩話。所載題咏。亦多佳作。至秦淮聞見錄。選徵當時名人詩詞。尤為宏富。蓋自王漁洋作秦淮雜詩二十首後。作者已如林也。紅羊劫後。秦淮勝景。稍稍規復。過江名士。麇唱迭和。不乏佳篇。有所見聞。隨時筆記。不及半載。已得數百首。蓋不獨存一時之風流。亦以寄一時之感概也。

王漁洋曾作秦淮雜詩。多言舊院時事。當時人競傳寫。板橋雜記曾載其三首。內有一首云。十里秦淮水蔚藍。板橋斜日柳毵毵。樓鴉流水空蕭瑟。不見題詩紀阿男。阿男名映淮。適杜氏以節聞。以青燈白髮之嫠婦。與莫愁桃葉同列。殊為綺語之過。漁洋後入為儀郎。乃力主覆疏。旌其閭。以自懺悔。（見漁洋詩話）又吾邑李訥。盒雙調南鄉子詞云。（桃葉渡）名士舊清談。渡口桃花帶雨慙。何處偏船雙打槳。珊珊。恐有桃根姊妹還。淮水自拖藍。尚有秦時月影涵。我比院亭來較後。摻摻。重憶題詩紀阿男。納盒既生阮亭後。不應再以三百年前之嫠婦。與桃葉桃根同咏也。

嘗見薛慰農藤香館小品有集句贈阿男云。生小未嘗離阿母。願天速變作男兒。此阿男當非閨秀也。

按漁洋詩話所載之阿男。乃國初詩人紀伯紫之妹。其秦淮柳枝詞。漁洋愛其棲鴉流水點秋光七字。阿男又題桃葉渡詩云。波搖秦代月。枝帶晉時春。亦係佳句。至薛慰農所言之阿男。當時同光時人物。

上元秦伯虞題余澹心板橋雜記絕句二首。笙歌畫舫月初沈。邂逅才人訂賞音。福慧幾生修得到。家家夫婿是東林。茉莉香中送晚涼。渡頭桃葉趁潮忙。十三樓上春如許。草草山河已夕陽。洵有漁洋神韻。明初於聚寶石城西關諸處。建輕烟淡粉梅妍柳翠等十四樓。以聚四方賓客。所謂花月春風十四樓也。十三樓當是十四樓之誤。

板橋雜記桃花扇院本。皆有一代興亡之感。不僅寫美人名士也。吾邑李吟伯明經題桃花扇院本云。豔說清溪水一鉤。媚香樓勝願迷樓。諸君也自耽聲色。爭怪官家不解愁。玉樹凋殘壁月涼。湖山依樣送降王。南朝亡國都風雅。詩酒乾坤粉黛場。一夕金城鐵鎖開。過江青蓋最堪哀。桃花扇子梅花塚。都是情天。

血性來

元薩都刺詞云。傷心千古秦淮。一片明月。近人熊李真詩云。兩戒河山經浩劫。秦淮明月古今存。天下之月皆同。而在秦淮則增人無窮之感。殆所謂風景不殊。舉目有河山之異耶。予舊作秦淮懷古詩云。蕭瑟秦淮絕可憐。輕烟淡粉總如烟。多情只有天邊月。曾照南朝歌舞筵。予又有秦淮雜詩云。酣歌恒舞任流連。恁奈從無不散筵。只有秦淮一片月。酒闌猶自照窗前。此則傷心人別有懷抱矣。

任渭長嘗為周雲將畫扇。一面寫折枝桃花。一面寫李香君小像。譚仲修為題虞美人詞云。春風冷向花枝笑。轉眼花枝老。淡烟依舊送南朝。何事美人顏色念奴嬌。天涯一樣文章賤。公子空相見。酒杯傾與隔江山。山下無多楊柳不堪攀。文道希和云。南朝一段傷心事。楚怨思公子。幽蘭泣露悄無言。不是桃根桃葉鎮相憐。若為留得花枝在。莫問滄桑改。鴛鴦灘鷺一雙雙。欲採芙蓉憔悴隔秋江。後周雲將亡。扇存其姬人沈栗娘處。栗娘者。秦淮名妓也。有香君風竟為情死。俞蔭甫有詩云。千秋兩柄桃花扇。前有香君後栗娘。易實甫詩云。生

無艷福。鷗波館死。有香名燕子樓。曹君直翠樓詞云。公娘如此。使我作迦陵。要存篋笥。芳名字。待君箋入。婦人集裏。嗚呼。栗娘。洵足為秦淮生色也。

黃公度夜泛秦淮和易實甫詩云。九州莽莽忽忽走。兩鬢蕭蕭漸漸枯。隔絕蓬萊來附鶴。折餘楊柳可藏烏。筆留白石飛仙句。袖有青溪小妹圖。猶是人間乾淨土。莫將樂國當窮途。蓋時當庚子之亂。翠華西幸。名士之渡江南者。不減前代。雖秦淮清溪。忘其治遊。莫愁鬱金。供其高會。而蒿目時艱。不禁感慨係之。

板橋雜記謂茉莉花苞於日中。開於枕上。真媚夜之淫花。滯人之妖草。都昌徐燮亭詩云。酒闌嬌情抱琵琶。茉莉新堆兩鬢鴉。消受香風在良夜。枕邊俱是助情花。又吾邑李訥盦詠茉莉（翠樓吟）詞云。枕函薰透。問同夢。今宵花心開否。又最好是秦淮巷口。隔河招手。記簾捲斜陽。新妝巧鬥。可謂描寫盡致。

白門新柳記。海陽許養和所作。成於壬申。記劫後秦淮名妓甚詳。附記白門衰柳。皆昇平舊人。近尚掛籍平康者。尤有滄桑之感。

白門新柳記。題詩最夥。其佳者如上元方伯雄詩云。秦淮依舊水盈盈。五載歸來百感生。漸喜近時復佳感。鼓鼙聲變管弦聲。沈江張春咳詩云。紅橋鬢影雜

衣香一曲琵琶最斷腸。露葉風枝可憐甚。瘦腰強學鬥新妝。全椒薛慰農詩云。
白門有客惜芳華。振觸前游舊酒家。多少幽懷成影事。故將彩筆記烟花。結伴
尋春得得來。赤欄橋畔重徘徊。可憐一樣秦淮柳。都是紅羊劫後栽。酒榼茶盞
載上船。有人艷說散神仙。那知客裡無窮感。多在倡條冶葉邊。東風著意管春
芳。花史修成字是香。此是昇平新記載。披風抹月未荒唐。展卷長吟喚奈何。數
株殘柳也婆娑。（附記白門衰柳）漫云老大無人問。記取當年璧月歌。北平丁硯
香詩云。又見春風上柳條。夕陽簫鼓水迢迢。南朝金粉飄零盡。舊記依然續板
橋。晴波搖盪綠楊絲。畫舫銀燈夜泛遲。惆悵風殘月裡。為卿重譜柳卿詞。江
甯陳雲榮詩云。碧玉年華妙入時。徐娘老去也堪思。番風念四重頭數。一卷烏
絲絕妙詞。上元姚友梅詩云。青溪曲曲水多情。冶葉倡條管送迎。解作曉風殘
月句。人間惟有柳耆卿。宰相風流憶謝安。重將錦繡換凋殘。夾城一路垂垂發。
當作平泉花木看。古歙江海門詩云。南朝金粉感飄零。城角啼烏不忍聽。快觀
昇平傳盛事。白門新種柳青青。

又題詞之佳者。上元秦伯虞綺羅香詞云。乞硯題紅。裁箋織翠。寫出妝樓新色。

波漲秦淮依舊花。晨燈夕。悵往事。劫火忽忽。賸逝水韶華堪惜。又今番冶葉倡
條。送人都作有情碧。花間燕鶯私語。話到六朝烟水。似曾相識。搓玉吹瓊。一
卷烏絲綺格。再休怨粉絮飄零。天付與生春妙筆。怕早晚化作青萍。東風吹太
急。休窺楊子。顧滿江紅詞云。丁字簾前。全不是舊經過處。更休問玉簫金管。綠
窗朱戶。裙屐無從尋北里。煙花誰解談南部。只秦淮河水尚西流。情波涵金
粉地。須培養風流藪。爭傾慕。累錦囊心血。品題花譜。才子文章工附會。美人聲
價遭奇妬。問幾人幽怨。托琵琶情如訴。上元劉雨生臺城路詞云。綠波漲滿青
溪渡。頻年漸吹春好。冶葉含情。倡條寄恨。依舊烟籠月照。鶯聲破曉。喜近水人
家。晨妝纔了。青眼爭邊。幾回臨鏡淡蛾掃。司勳舊曾遊處。悵笙歌兩岸。都長
寒草。環燕重評。賴楊細數。別有傷心懷抱。板橋再到。且續作羣芳。小名新稿。更
祝東風成陰須及早。上元王雪香念奴嬌詞云。玉簫聲裡。暮心頭觸起舊游情。
思十載歸來重問。詎水閣朱闌刺幾。蛩瘦偎烟。蟹寒叫月。往日追懽地。青溪無
恙。水流終古西逝。畢竟六代烟花。風流艷跡。興廢隨時事。一樣依依堤畔柳。
今我來思稍穉。才子吟豪。美人歌板。各有滄桑淚。板橋閒步。與君聊且謀醉。

侯官林述庵題桃花扇傳奇云。江山無恙說興亡。草草南朝夢一場。迸送英雄兒女淚。勝他檀板演西廂。領袖詞壇舊有名。陳吳慷慨兩書生。可憐纔出閨奴醜。從此東林黨禍成。春光不買賞花時。燈影秦淮萬柳絲。惆悵娟香樓舊事。繁欽手贈定情詩。從來巾幗幾英雄。慷慨當筵罵相公。笑看閨兒阮圓海。春燈謎裡可憐蟲。風流天子說無愁。按拍徵歌荊郢頭。花落後庭飛燕子。江山猶帶秣陵秋。文章無價筆通靈。水碧山青掩淚聽。收拾敗殘棋一局。戲場忙煞老雲亭。一彈三唱猶想見南都之舊塵也。

上元許海秋金縷曲云。別有傷心處。儘消磨。刮友金粉。大江東去。樓閣斜陽秋易晚。嗚咽青溪如訴。祇衰柳殘鴉無數。龍虎雄圖悲豎子。剩遺編細載。開歌舞。亡國恨。更難語。年來烽火臺城路。念無端。家山唱破。淒涼誰主。似有簫聲聞鬼哭。忍憶板橋風雨。慢惆悵。美人黃土。繞郭旌旗霜影重。恐將軍愁擊軍中鼓。早哀絕。子山賦。慷慨悲歌。可當哀絲豪竹。

中州周星詒朝中措詞云。畫船明月客衣單。日暮水生寒。白板垂楊。門巷紅樓。臨水闌干。而今寂寞。淡烟疏雨。人在天邊。正是熟梅時節。那堪重客江南。

乃板橋感舊之作也。

張孝達相國著有金陵游覽詩。謂兩假江節。不暇遊觀。甲辰春奉命來與江督議事。公事無多。日日出遊以謝客。其咏青溪云。劉江諸大宅。一礎不可尋。遺此衣帶水。穠華變清深。稍稍種桃柳。寡薄無繁陰。聊借三人航。寓我五湖心。燥吻甘止酒。茗碗自酌斟。清曠人語絕。時逢禪叢林。烟際聞相呼。三兩歸暝禽。何必牛渚月。已足愜素襟。得享一舸閑。勝擁千鎰金。曠達之念一消塵。意又金陵雜詩云。兵力無如劉宋強。勵精政治數蕭梁。原何不享百年祚。酖毒江山是建康。荒陂野水尚西流。朱雀橋邊繫釣舟。莫道南朝無可念。求書今少大航頭。孟老錄中思汴臺。達摩曲裡鄴城灰。世間少有蘭成賦。便覺江南最可哀。宰相荒嬉夜宴閑。保儀新拜掌書官。春風一半殘桃李。獨有潘郎忍淚看。北橫天。整雪濤。吞東擁鍾山。翠壁拥堪笑。謂之無遠致。賞心偏在水西門。(丁謂所作賞心亭在今水西門)耽隱周雷不可攀。樓霞訪古長鄉閒。明賢專翫板橋水。讓與貧僧住攝山。

樊雲門和張孝達青溪詩云。沿流入青溪。磷磷俯白石。鵝散蔣王祠。草深江令

宅六朝廟妖嬈荒怪久成習。將妹第三人。云是神君匹。導源是宋玉。神女極瑰飾。張孔卽朝雲。叔寶陽臺客。酣嬉三閣中。坐賴顛與弼。玉女朝朝花。能無外患集。江山如龍虎。王霸由此得。不聞獬廌嘆。全爲桓王策。舉國悅妍華。沓拖遂無力。願持此溪水。一洗金粉迹。

又樊雲門調爽翁卜安秦淮高陽台詞云。雀桁開花。雉塲秋柳。渠儂不解傷春。墮策閑坊。一株紅柏遮門。十三樓下秦淮碧。側烏絲親訪桃根。漫銷魂三十年來。此度纔真。(下畧)

洵貝勒蒞金陵時薄游青溪莫愁湖。慨然有懷舊之念。在莫愁湖題詩云。風月依然不老春。誰將蘊藉話前塵。鬱金臺畔波如鏡。照澈千秋畫裡人。美麗湖山更添一段佳話矣。

嘉興張公東憶舊游詞云。正鳴笳送晚。疊鼓驚寒。重繫吟橈。滿目滄桑。感漸荒蕪綠遍。戰壘蕭蕭。板橋幾株疏柳。霜悴短長條。笑社燕歸來。烏衣巷冷。舊隱誰招。魂銷冶游地。賸古渡斜陽。流水迢迢。畫舫飄零盡。只莫愁湖上。烟艇輕搖。指點遠山眉黛。金粉語南朝。但夢繞空江。鄉心此夕隨去潮。

洪秀全陷金陵時。於秦淮間立有女館。令人自擇配有女官媒以司其事。止許月晦同宿。餘日不得犯。上元吳家禎詩云。六軍女館重開防。廿五嬌娃聚一房。輪盼今宵逢月建。滿城飛遍野鴛鴦。蓋咏其事也。

通州范伯子謂秣陵中秋伯嚴以城間勝處在復成橋。約諸公擢小舟往會。至則風甚月不瑩。不能望遠。伯嚴遂欲出馬路窮探。而陶公所攜妓尼之。及返。權至四象橋。月色轉瑩澈。余與伯嚴徘徊良久。述以詩。詩曰。天高無雲但有風。分明璧月紗來籠。淒淒柳路行無窮。紆迴照暗燈微紅。鍾山只在城南東。高下一氣青迷濛。復成橋下煙景雄。到來指點殊難工。吾知陳生興墮空。祇欲急走爭溟濛。藉非有妓哀疲癯。遂入深深灌莽叢。須臾回舟月色融。歌管寂寞三更終。澄輝朗徹天當中。真鑒毫髮無昏瞳。可憐四象橋邊水。正照天涯兩秃翁。蕭山任孝和題桃花扇傳記云。餘春已被燕銜殘。流徵商音騰獨彈。重唱後庭花一曲。內人爭識孔都官。屏山九曲華燈照。午夜淒涼子夜歌。送別秦淮水鳴咽。短衣匹馬獨投戈。曲子新聲譜石巢。紅牙拍板紫檀槽。白門橋上綠絲柳。一別無情送六朝。中使傳宣選教坊。鈿車香滿入昭陽。從教拋却巫山夢。檢點黃

絕入道裝。夜半飛沈大將星。冰霜三尺拂青萍。江聲流恨靈旗黯。長古忠魂傍
孝陵。烏絲欄字寫冰紈。細譜宮商叶管絃。腸斷一聲河滿子。江南頭白李龜年。
哀歌搔首望茫茫。落日青山生話長。濁酒何能澆壘塊。兩行老淚哭興亡。秣陵
秋色仍如昨。憔悴蘭成感鬢華。賸水殘山無限恨。一齊收拾付琵琶。

又任孝和送人之金陵詩云。白門楊柳蘸煙低。殘月西風烏亂啼。醉倒旗亭小
鬟唱。頽唐扶上錦障泥。

秦淮聞見錄。載有武進黃仲則中秋夜游秦淮七古詩一篇。近覽黃仲則所著
之兩當軒集。其秦淮題咏尚有詩詞數篇。因選錄之。金陵雜感詩云。平淮初漲
水如油。鍾阜峨峨在上頭。花月即今猶是夢。江山從古不宜秋。烏啼舊內頭先
白。客到新亭淚已流。那更平生感華屋。一時長慟過西州。又過秦淮詩云。淒涼
苔蘚掩金釵。無復笙歌動六街。回首南朝無限恨。杜鵑聲裏過秦淮。又中秋夜
秦淮水榭臨江仙詞云。三載紅橋舊路。輕塵暗換年華。依然燈火照香車。玉簫
吹子夜。明月在誰家。前度青衫淚濕。重來破帽簷斜。殘人風景又天涯。垂楊
空繫馬。流水有歸鴉。

會稽李杰伯題扇頭李香君小影詩云粉本南朝絕可憐。扇頭璧月尚嬋娟。清
流何與人間事。花下長翻燕子箋。傾城一笑太情多。十斛明珠奈若何。畢竟秀
才空嫁與。輸他一品顧橫波。秋柳情深大道王。掌中猶見舞時妝。只憐曲裏桃
花扇。唐突當年鄭妥娘。

合肥李可亭有秦淮雜詩十六首。倚梳中饒有清趣。茲錄其七云。年來夢繞秣
陵舟。又作秦淮十日遊。長板橋空金粉謝。烟波猶帶六朝愁。丁字簾前送晚潮。
輕橈幾度戴紅綃。一聲短笛催歸去。涼月隨人過畫橋。參差水閣晚寒流。面面
珠簾盡上鉤。十里新隄楊柳色。美人樓上不知愁。晚風畫舫上燈時。絃管聲中
半醉癡。豪竹哀絲聽不得。一腔心事幾人知。纏頭擲盡阮公囊。贏得琵琶半面
妝。一曲當筵金縷恨。蕭蕭暮雨怨吳娘。莫愁居處石城西。又向湖亭認雪泥。煙
水不知人去久。寒風說與杜鵑啼。詞客梅村舊擅名。曾與詩酒識傾城。可憐踏
遍秦淮路。孤負江南卜玉京。

元和江建霞題卜玉京楹帖二絕句云。想見衫舒劍重時。玉窗香繭界烏絲。獨
愁一事梅村誤。不譽能書祇譽詩。舉舉師師姓氏迷。飛瓊仙迹近無稽。蜃眠小

字珊瑚押。莫誤楊家妹子題。又題玉京畫云。愛讀琴河感舊詩。楓林霜信數來遲。秋風紅豆相思種。定為蕭郎寫折枝。信筆揮灑妙緒天成。覺余澹心板橋雜記之言亦可徵信。

溧陽狄曼農秦淮詩云。秦淮疏柳勝絲絲。金粉南朝又一時。潮水碧涵妝閣冷。夕陽紅上釣船遲。箋翻燕子新聲艷。扇畫桃花舊夢癡。往事風流那堪問。卅年前共客題詩。

桃葉渡在利涉橋旁。按古樂府注。蓋晉王獻之送妾也。金陵王紹欽桃葉渡懷古詩云。閒來買棹青溪渡。春花秋月都非故。問到儂家舊姓名。桃根桃葉知何處。記得當年打槳迎。朝朝暮暮不勝情。美人一去隔秋水。風雨猶聞腸斷聲。無端烟月悲空散。六朝歷盡南朝換。黯黯秦淮滲不春。柳旁艇子何人喚。我今懷古悲荒涼。尋春江上弔斜陽。欲歸渡口歸不得。祇恐愁殺雙鴛鴦。

南甘泉毛元徵（乃庸）偕公約龍慧秦淮舟飲詩云。可憐曲曲青溪水。到此愁心肯暫消。飲博無聊何獨我。爭歌未散不知宵。眾生戀夢爭哀樂。斜月催人墮次寒。莽莽九州艱一騁。願驂虬鳳聽仙簫。又秦淮肆飲詩云。縱有憂虞亦謀

樂匠羅入手已全乾。燈船掠水搖花影。風檻平波逗夕寒。人事膏騰宜醉眼。天衢幽遠阻塵翰。酒酣不那應難忍。捉取金丸向月彈。

閩縣林穎叔（壽眉）題顧橫波墨蘭（後有龔芝麓跋語）詩云。分明九畹寫靈均。解佩如逢洛水濱。異代尚書雙合璧。趙文敏有管夫人。老大風流擅畫眉。墨花悟入折釵枝。梅村不遂東山隱。枉及文青未嫁時。板橋雜記謂柳敬亭善說書。常往來南北曲以彈詞著。長樂謝枚如（章鉞）題柳敬亭畫像詩云。居然傾倒到衣冠。不朽誰知在稗官。老死丹鉛凡幾輩。埋頭遙望敬亭山。蕭然抱膝意如何。好友難題盡短歌。知否昆明友刼換。國殤遺老紙邊多。（畫有范質君冒巢民題句）

吾邑茅子貞咏秦淮河燈七排詩云。給孤長者普燈傳。撒落清漪的暈圓。竟拔沉冥騰碧燭。頓生歡喜到黃泉。僧伽短帽游行隊。鬼趣長河不夜天。彼岸莫迷關口路。慳囊分破陌頭錢。罡風過去仍為紙。法界飄遙盡是蓮。黑暗獄中聊解脫。大光明界締因緣。送他北里臙脂澤。接引西方泡幻禪。寒渚乞兒驚照席。大坑妖子對鳴絃。隔開屏井淒香骨。繞出州門燭墓田。一霎曇華留小住。九幽色

相現無邊。上流低放婆心。細畫閣遙窺媚眼。穿魔女嬉遊。涵鬢影。辟支梵唱。離經筵。幢幢景擾星稀。後艷艷花爭。日上前。雙槳恨他旋滅度。橫橋庇爾。午團烟。微波木葉吹秋朗。甘露盆蘭灑佛光。無賴中元催去速。明年會看釣魚船。

予嘗徵秦淮雜詩於江都梁公約。旋得其復函云。風雨江皋。亂愁如織。愴懷時事。不復能為綺語矣。前承雅命。搜羅故篋。十不存一。僅得詞一闕。小詩四首。不值方家一笑也。其秦淮秋夜菩薩蠻詞云。湘簾做暝。詞珠歇。雙鬟茉莉顏香雪。何處笛聲柔。水痕衣上秋。燈闌香已灺。隔檻聞雙舫。雙舫催人醒。羅幃知月明。題龍慧扇頭詩云。姹紫嫣紅中酒天。風尖月小思慙慙。拼將十日江南醉。別後風塵一惘然。劉郭江湖最少年。當歌對酒放狂顛。如今都醒樊川夢。一任青溪柳作絲。翠羽明璫誇小小。玉簫金瑣舞僊僊。思拋後約將人誤。珍重秋宵月子圓。雙玉亭亭泥酒邊。離愁萬疊似增川。秋風趣放江南棹。況是木樨香可憐。數篇皆風神摇曳。信是才人之筆。愧無烏絲欄格以寫之也。

秦淮雜詩。自王漁洋後。題咏者名作如林。如金壇馮夢華中丞（煦）秦淮燈舫曲云。羅衣初試晚風柔。春盡秦淮碧玉流。芍藥將闌新燕乳。有人催上木蘭舟。